

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

1.1. Siunnersuutip tunuliaqutaa siunertaalu

Siunnersuut Naalakkersuisut malittarisassanik peqqinnissaqarfiup nunatsinni peqqinnissakkut akeqanngitsumik sullinneqarnissamut pisinnaatitaaffeqanngitsunut akiliuteqartitsisalnissaanut piginnaatitsilersussanik atuutilersitsisinnaaqqullugit, peqqinnissaqarfiup sullissineri il.il. pillugit Inatsisartut peqqussutaata allanngortinnissaanut tunngavoq. Tunuliaqutaasoq tassaavoq, peqqinnissaqarfik nunatsinni peqqinnissakkut akeqanngitsumik sullinneqarnissamut pisinnaatitaaffeqanngitsunik aallarnisaataasumik allatulluunniit misissortariaqakkanik peqqinnissakkut sullissisoqarsimatillugu immikkut allaffissornermut suliarisariaqakkanullu allanut immikkut aningaasartuutaasariaqarsimasut matussuserneqarsinnaasarnissaat.

Nunami allami innuttaassusilimmik allamilluunniit nunatsinni peqqinnissakkut akeqanngitsumik sullinneqarnissamut pisinnaatitaaffeqanngitsumik peqqinnissaqarfimmi aallarnisaataasumik sullissineq immikkut aningaasartuuteqarfiusarpoq, tamatumani peqqinnissaqarfiup qarasaasiatigut nalunaarsuiffiit suliamik allartitsineq, nalunaarsuineq, kiunermik paasissutissanik pissarsiorneq kiisalu sullissinissamut aallarnisaataasussanik laboratoriami misissugassanik tigusineq isumagineqartartunut aamma ilaallutik. Tamanna tamakkununga aningaasartuutaasartunut matussusiissutaasinnasunik akiliuteqartitsisalnissamut inatsisitigut erseqqissunik maleruagassiornissamut tunngavissaqarlualpoq.

Siunnersuut saniatigut allaffissornerunermut aningaasartuutit tamakkiisumik matussuserneqarsinnaaqqullugit akigititassanik peqqinnissaqarfiup sullissinernut taamaattunut aningaasartuutigisimasaaningarnit qaffasinnerusunik aalajangersaanissamut aamma periarfissiisussaasaaq, isumagineqartartunut ataasiakkaanut aningaasartuutaasunik maliinnartumik nalilersuisarnerit akigititanillu pisariaqanngitsumik allanngortitsikulaarnerit taamaalillutik pisariaarutissammata. Tamanna sukannernerusumik tunngavissaqarnissamut piumasaqaateqarnerup ilagaa.

Siunnersuut inatsimmi oqaaseqatigiinnik taaguutinillu allaffissornikkut aqqissuussaanermi maanna atuuttumi atorpeqartartunut naleqqussaalluni allanngortiterinissamut aamma tunngasortaqaarpoq, tassa soorlu ima allaqqasut ”Namminersornerullutik Oqartussat” allanngortinneqassapput imaalillugit ”Naalakkersuisut”.

Tassa siunnersuut oqaaseqatigiinnik taaguutinillu allanngortiterinissamut malittarisassanillu erseqqissaanissamut aamma tunngasortaqaarpoq.

2. Siunnersuummi immikkoortut pingaarnerit

2.1 Inatsisitigut malittarisassat atuuttut

Naalakkersuisut Peqqinnissaqarfiup sullissineri il.il. pillugit Inatsisartut peqqussutaanni § 24 naapertorlugu nunatsinni peqqinnissakkut sullinneqarnissamik pisinnaatitaaffeqanngitsoqarpat taakkununga, tamatumani soorlu takornarianut, akiliuteqartitsisarneq pillugu malittarisassanik aalajangersaasinnaapput.

Tamatumani piginnaatitsissut Peqqinnissaqarfimmi sullissinermut akiliuteqartarneq pillugu kaajallaasitaq nr. 17-imi atulersinneqarpoq. Kaajallaasitarli taanna nalunaarutitut ilusilerlugu nutarterneqaleruttorpoq.

Inatsisitigut malittarisassat naapertorlugit akiliuteqartitsinermut akigititassatut aalajangersakkat peqqinnissaqarfiup sullissinermut ataatsimut aningaasartuutaaninngarnit qaffasinneroqqusaanngillat, tamatumani akileeqqusinissamut inatsisitigut erseqqissumik tunngavissaqarnissaq piumasqaataammat.

2.2 Siunnersuut

Naalakkersuisut inunnut nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunut akiliuteqartitsisarneq pillugu malittarisassanik erseqqinnerusunik aalajangersaanissamut tunngavissilluarnissaat anguniarlugu inatsimmut pineqartumut maanna atuuttuusumut ilassuteqarnissaq, siunnersuummi pingaarnertut siunertaavoq. § 24, imm. 2-tut ilanngunneqartussatut siunnersuut, Naalakkersuisut peqqinnissakkut sullinneqarnermut akiliisussaataaneq pillugit malittarisassanik aalajangersaasinnaanissaannut paatsuugassaanngitsumik piginnaatitsilertussaassaaq, tamatumani akigititassanik aalajangersimasunik peqqinnissaqarfiup sullissinernut taamaattunut aningaasartuutigisimasaaninngarnit qaffasinnerusunik aalajangersaanissamut tunngavigneqarsinnaassallutik.

Tamanna soorlu peqqinnissaqarfiup tamatumunngarpiaq tunngatillugu allaffissornermut aningaasartuutaanut matussusiissutissanik nakorsiarnermi aallarnisaataasumik assigisaanilluunniit misissorneqarnermut naleqquttumik akiliuteqartitsisalermissamut ammaassisussaassaaq.

Tamatuma saniatigut oqaatsinut aaqqissuussaanermullu tunngasunik arlalitsigut erseqqissaanertaqartussaassaaq, tamatumani ima allaqqasut ”Namminersorerullutik Oqartussat” allanngortinneqassallutik imaalillugit ”Naalakkersuisut”, taamatullu ima allaqqasut ”Peqqinnissamut Pisortaqaarfik” aamma allanngortinneqassallutik imaalillugit ”Naalakkersuisut”, tamatumani suliaasaq naalakkersuisoqarfimmut peqqissutsimik suliaasaqarfimmut akisussaasuusumut suliaassiisutigineqassalluni.

Nunatsinni inuit allattorsimaffianni nalunaarsorsimasut taavalu najugallit § 24, imm. 2 pillugu siunnersuummi pineqanngillat, taamaammallu nunaqavissunut attuumassuteqarnaviarnani.

Takornarialli tikeraallu allat nunatsinni peqqinnissakkut akeqanngitsumik sullinneqarnissamut pisinnaatitaaffeqanngitsut, aalajangersakkami tassani pingaarnertut pineqarput.

Siunnersuut Inatsisartut inatsisaat naapertorlugu kikkut peqqinnissakkut sullinneqarnissamik pisinnaatitaaffeqartuunerannik kikkullu pisinnaatitaaffeqartuunnginnerannik allannguissamut

tunnganngilaq. Peruluuteqalersarnermi, anigorsinnaanngisamik nappaateqarnermi ajornerulernermi, ajoquserujussuarnermi assingusumilluunniit nalaataqarnermi peqqinnissakkut akeqanngitsumik ikiorneqarsinnaatitaaneq Danmarkimiit Savalimmiuniillu nunatsinni najugaqarallartunut atuutiinnassaaq. Aammattaaq nunanit avannarlerneersut EU-meersullu nunatta nunallu taakkua akornanni peqqissartinnissamut tunngasutigut isumaqatigiissutaat atuuttut naapertorlugit nunatsinni peqqinnissakkut akeqanngitsumik aamma sullinneqarsinnaatitaaffeqaannassapput.

Taamaammat § 24 naapertorlugu akiliuteqartitsinerusalernissamut tunngavissatut aalajangersakkat takornarianut peqqissarneqalernissamik ujartuinngikkaluarlutik sullinneqarumallutik peqqinnissaqarfimmut saaffiginnittunut annermik atuuttussaassapput. Takornariat Danmarkimeersut tamatumani aamma pineqarput. Akiliuteqartitsinerusalernissamut tunngavissatut aalajangersakkat nunat avannarliit EU-llu tassa nunatsinni akeqanngitsumik peqqissarneqarsinnaatitaanermik isumaqatigiissuteqarfiunngitsut avataanni najugaqartunut, peqqissarneqalernissamik pisariaqartitsinersut pisariaqartitsinnginnersulluunniit apeqqutaatinnagu, aamma atuutsinneqarsinnaassapput.

3. Pisortanut aningaasaqarnikkut allaffissornikkullu kingunerisinnaasai

Siunnersuut Naalakkersuisut peqqinnissakkut sullinneqarnermut inunnut pineqartunuinnaq akiliuteqartitsisarnissaq pillugu malittarisassanik aalajangersaanissaannut taamaallaat piginnaatitsissutaasussaassammat, siunnersuut immiini pisortanut aningaasaqarnikkut allaffissornikkulluunniit kinguneqassangatinneqanngilaq.

Nalunaaruteqarnikkut piginnaatitsissutaalernissaa akuerineqassappat, tamatuma kingorna aningaasaqarnikkut aatsaat kinguneqartussaalersussaassaaq. Piginnaatitsissummik atuutilersitsineq peqqinnissakkut sullissinermit aningaasartuutit piffissap ingerlanerani amerlanerulertussaassammata tamatumunnga akiliuteqartitsinermit nutaamik naatsorsueriaaseqalernerup kingunerisaanik nunatta karsianut isertitat amerlerataannaapput. Piginnaatitsissummik atuutilersitsineq inatsisip nutartikulaartariaarunneranik kinguneqartumik allaffissornermuttaaq pisarissersuutaqqunagu akigititanik nalimmassaanermut aalajangersaanertaqarsinnaavortaaq.

4. Inuussutissarsiutilinnut aningaasaqarnikkut allaffissornikkullu kingunerisinnaasai

Siunnersuut Peqqinnissaqarfiup sullissineranut inunnut pineqartunuinnaq akiliuteqartitsinermit akigititassat pillugit aalajangersaanissamut taamaallaat tunngaviusussaassammat, inuussutissarsiutilinnut aningaasaqarnikkut allaffissornikkullu toqqaannartumik kinguneqarujussuassangatinneqanngilaq.

Allannguutissat peqqinnissaqarfimmi allaffissornermuinnaq peqqinnissakkullu akeqanngitsumik sullinneqarnissamut pisinnaatitaaffeqanngitsunuinnaq tunngatinneqarput.

Inuilli ilaannut soorlu takornarianut nunamiillu allamiit nunatsinnut suliartortunut peqqinnissakkut akeqanngitsumik sullinneqarnissamut piumasaqaatinik naammassinnissimanngitsunut tunngatinneqartussaassaaq. Inuilli pineqartut angalanermut sillimmasersinnaammata, inuussutissarsiutilinnut annikitsuinnarmik kinguneqartussaassangatinneqarpoq. Tamannali § 24, imm. 2 tunngavigalugu nalunaarutip saqqummiunneqarnerata ilutigisaanik missingersuunneqaqqissaartussaassaaq, tamatumani tusarniaaffigineqartut peqataatinnerisigut.

5. Avatangiisinut, pinngortitamut innuttaasullu peqqissusaannut kingunerisinnaasai

Siunnersuut avatangiisinut pinngortitamullu sunniuteqassangatinneqanngilaq. Allanguut innuttaasut peqqissusaannut aamma sunniuteqassangatinneqanngilaq. Siunnersuut nunatta inuisa peqqinnissaqarfimmi sullinneqarsinnaatitaanerannik allanguinaviannngilaq, nunatsinnili peqqinnissakkut akeqanngitsumik sullinneqarnissamut pisinnaatitaaffeqanngitsunut akiliuteqartitsinermut malittarisassanik allanguinermut taamaallaat tunngassalluni. Taamaammat siunnersuut innuttaasut peqqissusaannut kinguneqarnerlussangatinneqanngilaq.

6. Inuttut pisinnaatitaaffiit aamma innuttaasunut kingunerisinnaasai

Siunnersuut innuttaasunut imaluunniit inuttulluunniit pisinnaatitaaffinnut tunngasutigut kingunerluuteqarnaviannngilaq. Nunatsinni peqqinnissakkut akeqanngitsumik sullinneqarsinnaatitaasunut sunniuteqarnaviannngilaq. Peqqinnissakkut akeqanngitsumik sullinneqarnissamik pisinnaatitaaffeqanngitsut akiliillutik sullinneqarsinnaatitaanerat atuutiinnassaaq, akiliuteqartitsinermulli malittarisassat erseqqissarneqarlutillu paasiuminarnerulissapput.

Nunat tamalaat akornanni pisussaaffinnut akerliusumik assigiinngisitsinermik kinguneqarnaviannngilaq.

7. Allatigut malunnartumik kingunerisinnaasai

Siunnersuut allatigut kinguneqarujussuassangatinneqanngilaq.

8. Oqartussaasunut, kattuffinnut il.il. tusarniaaneq

Siunnersuut piffissami 16. aprili 2026-miit tusarniaassutigineqarpoq, tamatumunngalu akissuteqarnissamut ulloq 12. maaji 2026 piffissaliussaalluni. Siunnersuut naalakkersuisoqarfinnut attuumassuteqartunut nassiunneqarlunilu Naalakkersuisut nittartagaanni saqqummiunneqarpoq.

Tusarniaanermi allakkanut tunngatillugu ilanngussaq 2 innersuussutigineqarpoq.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Aalajangersagaq oqaatsinut tunngasutigut assigiissaarinertaqarpoq, tamatumani aalajangersakkani pineqartuni soorlu ima allaqqasut ”Namminersornerullutik Oqartussat” allanngortinneqassallutik imaalillugit ”Naalakkersuisut”. Allanguutit inatsisitigut naqqiinerinnaammata imarisaanut, pisinnaatitaaffinnut pisussaaffinnullu tunngasutigut allannguinaqanngilaq. Tassa tamatumani aalajangersakkat allanngortinneqaratik atuutiinnassapput.

Nr. 2-mut

§ 24, imm. 2-p nutaatut ikkunneqarnera, malittarisassat §24, imm. 1 naapertorlugu atuutilersitat Peqqinnissaqarfiup sullissinermut ataatsimut aningaasartuutaaninngarnit qaffasinnerusumik akiliuteqartitsinermut akigititassanik aalajangersimasunik aalajangersaanissamut tunngavigineqarsinnaanerannik kinguneqartussaassaaq.

Piginnaatitsissut atortillugu naleqquttumik tunngavilersorluakkamillu atornissaa pingaartinneqassaaq. Isumalluutinik sullissinerni taamaattuni ataasiakkaani aningaasartuutivinnik naatsorsueqqissaarnermut asuliinnaq atuisoqaqqunagu, aalajangersagaq ilaatigut pisariitsumik allaffissornissamik akigititassanillu aalajangersimasunik assigiissaartumik aalajangersaanissamik siunertaqarpoq.

Tassa aalajangersagaq peqqinnissaqarfiup aningaasartuutaata tamatumunngalu tunngatillugu allaffissornikkut aningaasartuutaata matussuserneqarnissaannut inatsisitigut tunngavissiiginnanngilaq. Aammattaaq nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunut akigititassanik qaffasinnerusumik aalajangersaanissamut aamma tunngavissiivoq, tamatumani aningaasartuutaasuninngarnit qaffasinnerusunik akigititaqarnissaaq politikkikkut aalajangersarneqarsimappat. Taamaammat tassa sullissinermut taamaattumut aningaasartuuteqarneruneq pisimanngikkaluartorluunniit, akigititassanik sullissinermut taamaattunut aningaasartuutiviusuninngarnit qaffasinnerusumik aalajangersaasoqarsinnaassaaq.

Aalajangersagaq inunnut peqqissutsimut inatsisit naapertorlugit nunatsinni peqqissutsikkut akeqanngitsumik sullinneqarnissamik pisinnaatitaaffeqanngitsunuinnaq tunngavoq. Taamaammat tassa inuit peqqinnissakkut akeqanngitsumik sullinneqarnissamik pisinnaatitaaffillit aalajangersagaq tunngaviatigut eqqorneqaatiginaviannngilaat.

Akigititassanik aalajangersaanermut pingaarnertut tunngavigineqarnersut, tamatumani akigititassanik aalajangersimasunik aalajangersaanermi suut isiginiarneqartarnersut, naatsorsuinermi aningaasaqarnermut tunngasuni suut tunngavigineqartarnersut, aamma aningaasartuutiviusut saniatigut ilassutitut akiliutissat qanoq aalajangersarneqartarnersut,

malittarisassani aalajangersagaq tunngavigalugu atuutilersitani nassuiarneqarsimanissaat naatsorsuutigineqarpoq.

Akigititanik kattussilluni akiligassiisoqarsinnaanersoq, kiisalu arlaleriarluni sullissinernut katsorsaannulluunniit taamaattunut akigititassanik qanoq naatsorsuisoqarsinnaanersoq malittarisassani aamma nassuiarneqarsimanissaat naatsorsuutigineqarportaaq.

Peqqinnissaqarfimmut akiliisussaataasunullu naatsorsuutigineqarsinnaaqqullugit paasiuminartooqqullugillu, akiliuteqartitsinermut malittarisassat nutaat peqqinnissakkut sullissinermi arlalitsigut misissuinerimi qanoq ilisukkut atuutilertarnissaasa malittarisassani erseqqissaatigineqarsimasariaqarportaaq.

Imm. 2 nakorsiat immikkut sullinneqartariaqarsimasut eqqaassanngikkaanni, nakorsianut ataasiakkaanut aalajangersimasunik akigititaqartitsinissamik aalajangersaanissamut piginnaatitsinngilaq. Tassa akigititat aalajangersimasuunnarlutillu tamanut saqqummiunneqassapput, allanngortinneqassagaluarpatalu nalimmassarneqassagaluarpataluunniit tamatumani qanoq aaqqiisoqarneranik erseqqissaasoqarnissaa qulakkeerneqassaaq.

Peqqinnissaqarfiup sullissinermut ataatsimut aningaasartuutaaninngarnit qaffasinnerusumik akigititassanik aalajangersimasunik aalajangersaanissamut tunngavissaq, kommunit toqqaannartumik akiliisussaataaernerannut attuumassuteqanngilaq. Taamaammat akigititanik aalajangersimasunik aalajangersaasoqaraangat taakkulu atorneqaraangata, kommunit peqqinnissaqarfiup aningaasartuutigisimasai tunngavigalugit toqqaannartumik akiliisussaataasarnissaat qulakkeerneqartassaaq. Assersuutigalugu naatsorsueriaatsit immikkut ittut, akigititassat allatulluunniit periusissatut aalajangersakkat peqqinnissaqarfiup aningaasartuutaaninngarnit amerlanerunngitsunik kommuninut toqqaannartumik akiligassiisoqartarnissaanik qularnaarilluinnartussat atornerisigut taamaaliortoqarsinnaavoq.

Aalajangersagaq akigititassatut aalajangersagaq najoqqutaralugu aalajangersakkat kommunit aningaasaqarniarnerannut inatsisitigut, isumaqatigiissutitigut aalajangikkatigulluunniit allatigut pissuteqartumik toqqaannanngitsumik sunniuteqarsinnaaneranut killiliisuunngilaq. Toqqaannanngitsumik sunniutaasinnaasutut taasat kommunit toqqaannartumik akiliisussaataaernerannut malittarisassatigut killigeqqusani ilaatinneqanngillat.

Nr. 3-mut

Aalajangersagaq allannguinaqarpoq, imm. 1-imi ima allaqqasoq Peqqinnissamut Pisortaqaqfimmumt imaalillugu Naalakkersuisunut, taamatullu imm. 2-mi allaqqasoq imaalillugu naalakkersuisoqarfik. Tamanna oqaatsitigut allannguineruvoq, aalajangersakkallu imarisaannut sunniinaviarani. Aalajangersakkap piginnaatitsinera taamaaginnarpoq.

Aalajangersagaq imm. 3-mittaaq ima allaqqasoq "Peqqinnissamut Pisortaqaqfiup" peerneqarpoq. Allanguineq tamanna oqaatsitigut aamma allannguineruvoq, aalajangersakkallu piginnaatitsineranut imarisaanullu aamma sunniinaviarani.

Inatsisartut inatsisaat aalajangersagaq naapertorlugu 1. januaari 2027-mi atuutilersinneqassaaq.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuutigineqartoq</i>
	§ 1 Peqqinnissaqarfiup sullissineri il. il. pillugit Inatsisartut peqqussutaat, tak. Peqqinnissaqarfiup sullissineri il.il pillugit Inatsisartut peqqussutaannik Namminersorlutik Oqartussat nalunaarutaat nr. 44, 26. septembari 2023-meersoq, allannguutissat makkuupput:
	1. § 2, imm. 2 aamma 3-mi, § 6, imm. 1-3-mi, § 8-mi, § 10, imm. 3-mi, § 13-imi, § 14, nr. 6, 7 aamma 10-mi, § 15, imm. 2-mi, § 18, imm. 2-mi, § 20-mi, § 22, imm. 1, 3 aamma 4-mi, § 23, imm. 1 aamma 2-mi, § 24-mi, § 25, imm. 1 aamma 2-mi, imm. siulleq aamma imm. tullia kiisalu § 26, imm. 1 aamma 2-mi ima allaqqasut “Namminersornerullutik Oqartussat” allanngortinneqassapput imaalillugit: ”Naalakkersuisut”.
	2. § 24-mi imm. 2-tut ilanngunneqassaaq: ” Imm. 2. Malittarisassat imm. 1 naapertorlugu atuutilersitat Peqqinnissaqarfiup sullissinermut ataatsimut aningaasartuutaaninngarnit amerlanerusunik akiliuteqartitsinermut akigititassanik aalajangersimasunik aalajangersaanissamut tunngavigineqarsinnaapput. Akiliisitsiniartoqartillugu peqqinnissaqarfiup

	sullissinnermut aningaasartuutigisaaninngarnit qaffasinnerusumik kommunit akiliisinneqaqqusaanngillat.
§ 29. Naammagittaalliuutit, § 28-misut peqqinnissaqarfimmi sulisuusut suliaannut tunnganngitsut, Peqqinnissamut Pisortaqarfimmut tunniunneqartassapput, taamaattorli § 22, imm. 1 takuuk. <i>Imm. 2.</i> Naammagittaalliuut kingusinnerpaamik tunniunneqassaaq ullormit aalajangiinerup nalunaarutigineraniit sapaatit akunneri sisamat qaangiutsinnagit. Naammagittaalliuut allaganngorlugu Peqqinnissamut Pisortaqarfimmut tunniunneqassaaq. <i>Imm. 3.</i> Peqqinnissamut Pisortaqarfiup aalajangiinera allaffissornikkut oqartussaasunut allanut ingerlateqqinneqarsinnaanngilaq.	3. § 29 ima oqaasertalerneqassaaq: ” § 29. Naammagittaalliuutit peqqinnissaqarfimmi sulisut suliaannut § 28-mi taaneqartuusunut attuumassuteqanngitsut, Naalakkersuisunut nassiunneqassapput. <i>Imm. 2.</i> Aalajangiisoqarnerata nalunaarutigineqarneraniit naammagittaalliornissamut killiliussaq sapaatit akunnerinik sisamanik sivisussuseqarpoq. Naammagittaalliuut allaganngorlugu nassiunneqassaaq. <i>Imm. 3.</i> Aalajangiineq oqartussaasunut allanut suliareqqitassanngortinneqarsinnaanngilaq.”
	§ 2 Inatsisartut inatsisaat 1. januaari 2027-mi atuutilissaaq.

Tusarniaanermi allakkiaq

Tusarniaanermut akissuteqarnissamut piffissaliussap qaangiussimalernerani Kommuneqarfik Sermersooq akissutisiffigineqarpoq.

Tusarniaanermut akissummi sammineqartunik nalilersuinikkut pingaarnersiukkat kisiisa ingerlateqqinneqarput. Naalakkersuisut tusarniaanermut akissummut oqaaseqaatai uingasumik allataapput.

Kommuneqarfik Sermersooq

Inatsisissatut siunnersuutip tusarniaassutigineqarneranik toqqaannartumik ilisimatinneqarsimanatik siunnersuulli Naalakkersuisut nittartagaanni tusarniaanermut quppernermi nammineq ujjartorsimagitsik, Kommuneqarfik Sermersuumit oqaatigineqarpoq.

Inatsisissatut siunnersuutip siunertaa, tamatumani nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunut akiliuteqartitsisalernissap periarfissaalernissaa, tunngaviatigut taparseritsik, Kommuneqarfik Sermersuumit oqaatigineqarportaaq.

Tamatumani oqaatigineqartut Naalakkersuisut tusaatissatut tiguaat.

§ 24, imm. 2-p nutaatut ikkunneqartussatut siunnersuutigineqartuusoq peqqinnissakkut sullissinnermut aningaasartuutaasuninngarnit qaffasinnerusumik akiliuteqartitsinnermut akigititassanik aalajangersimasunik aalajangersaanissamut tunngavissiiisussaassasoq, Kommuneqarfik Sermersuup maluginiarpaa. Aalajangersakkap taassuma kommunit akiliisussaataitaanerannut tunnganani nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunut taamaallaat atuunnerata inatsisissatut siunnersuummi erseqqissarneqarnissaa kommunimit kissaatigineqarpoq.

Tamatumunnga tunngatillugu napparsimasut inaarutaasumik katsorneqarnerannut akiliisarnerat pillugu nalunaarut § 24 tunngavigalugu atuutilersitatut maanna atuuttoq kommunip innersuuppaa, taamaammallu aalajangersakkap atuuffia erseqqissarneqartariaqartoq kommuni isumaqarpoq.

Aalajangersagaq kommuninut aamma atuutsinneqassappat, siunnersuut kommuninut nutaatut tusarniaassutigineqaaqqittariaqartoq, taamatuttaaq aningaasaqarnikkut kingunerisinnaasai erseqqissarneqartariaqartut kommunillu ataatsimoortumik tapiissutit pillugit isumaqatigiisummut ilanngunneqartariaqartut kommunip aamma oqaatigaa.

Naalakkersuisut aalajangersakkap atuuffiata erseqqissarneqartariaqarneranut isumaqataapput. Taamaammat tusarniaanermut akissut inatsisissatut siunnersuummi allannguinerinik kinguneqarpoq. Taamaammat peqqinnissaqarfiup aningaasartuutaaninngarnit amerlanerusunik

kommuninut akiligassiisoqaqqusaannginnerata § 24, imm. 2-mi erseqqissumik aalajangersarneqarnissaa siunnersuutigineqarpoq. Taamaammat tassa Peqqinnissaqarfiup sullissinermut ataatsimut aningaasartuutaaninngarnit qaffasinnerusumik akigititassanik aalajangersimasunik aalajangersaanissamut tunngavissap kommunit toqqaannartumik akiliisussaataitanerannut attuumassuteqannginnera siunnersuummi erseqqissarneqarpoq.